

# 草堂警句精華

觀奕道人撰/淨空學 輯錄

## 第一集 (節錄自 陽消夏錄)

- 夙冤，世無不可解之冤。
- 至人騎猛虎，馭之猶騏驥；豈伊本馴良，道力消其驚。乃知天地間，有情皆可契；共保金石心，無為多畏忌。
- 真孝婦，鬼神見之猶歛避。
- 陰律一不孝罪至重。
- 業緣一日不可減，亦一日不可增，惟遲早則隨所願耳。
- 善留其有餘，惜福者當如是。
- 知其不可而為之，諸葛武侯曰：鞠躬盡瘁，死而後已。成敗利鈍，非所逆眦，此聖賢立命之學。
- 果一生無利己損人心，鬼神皆加禮敬。
- 人心微曖，鬼神皆得而窺；雖賢者一念之私，亦不免於責備。
- 削髮辭家淨六塵，自家且了自家身；仁民愛物無窮事，原有周公孔聖人。
- 聲色之娛，電光石火，皆幻化也。懸崖撒手，轉瞬成空。朱顏不駐，白髮已侵。
- 巧取人財，必有一意外事耗去。
- 人心一動，鬼神知之；以邪召邪，神不得而咎。
- 聖人之心，與天地通；諸大儒闡發聖人之理，其精奧亦與天地通，故相感也。
- 古詩云：水性自云靜，石中亦無聲；如何兩相激，雷轉空

山驚。

- 心亂神渙，鬼得乘之；神志湛然，鬼慙而去。
- 事皆前定，豈不信然？
- 紀公一侍姬，平生未嘗出詈語。自云：親見其祖母善詈，後了無疾病，忽舌爛至喉，飲食言語皆不能，宛轉數日而死。
- 驅厲鬼，毀淫祠，正狄梁公范文正公輩事，德苟不足以勝之，鮮不致敗。
- 卜地見書，卜日見禮；苟無吉凶，聖人何卜？但恐非今術士所知耳。
- 世人無如人慾險，幾人到此誤平生。
- 明某翰林侍姬，不幸夭逝，因平生巧於讒構，使一門骨肉如水火，冥司見譴罰為瘖鬼，已沉淪二百餘年。乞人為書金剛經十部，藉之懺悔，脫離鬼趣。然前生罪重，尚須三世作啞婦，方能語耳。
- 推算干支，或奇驗，或全不驗，或半驗半不驗。余嘗以聞見最確者，反覆深思，八字貴賤貧富，特大概如是。其間乘除盈縮，略有異同。
- 物之反常者為妖。
- 明鏡空空，故物無遁影。然一為妖氣所翳，尚失真形，況私情偏倚，先有所障者乎。
- 正心誠意，必先格物致知。
- 人可欺，鬼神不可欺。佛言一切眾生，慎勿造因。
- 科名先一年亦不可得，彼營營者何為也耶？即求而得之，亦必其命所應有，雖不求亦得也。

- 心如枯井，波瀾不生。富貴亦不睹，飢寒亦不知，利害亦不計者，斯為上。
- 心存誠敬，但知國計民生，不知禍福毀譽耶。
- 人心愈巧，則鬼神之機亦愈巧。
- 孝悌之至，通於神明。
- 聖人之立教，欲人為善而已。其不能為者，則誘掖以成之；不肯為者，則驅策以迫之，於是乎刑賞生焉。能因慕賞而為善，聖人但與其善，必不責其為求賞而然也。能因畏刑而為善，聖人亦與其善，必不責其為避刑而然也。
- 問：命皆前定然乎？曰：然。
- 問：定數可移乎？曰：可。大善則移，大惡則移。
- 問：孰定之？孰移之？曰：其人自定自移，鬼神無權也。
- 問：果報何有驗有不驗？曰：人世善惡論一生，禍福亦論一生；冥司則善惡兼前生，禍福兼後生，故若或爽也。
- 忠孝節義，上帝所重。
- 怨毒之於人，甚矣哉！白骨可成塵，游魂終不散；黃泉業鏡臺，待汝來相見。
- 滿腹皆書能害事，腹中竟無一卷書，亦能害事；國奕不廢舊譜，而不執舊譜；國醫不泥古方，而不離古方。故曰：神而明之，存乎其人。又曰：能與人規矩，不能使人巧。
- 天地之陰陽均調，萬物乃生。人身之陰陽均調，百脈乃和。
- 形不自變，隨心而變。讀聖賢之書，明三綱五常之理，心化則形亦化矣。
- 讀書，但求明理。聖賢言語，本不艱深，口相授受，即可知其義旨。

- 人生以孝弟為本，二者有慚，則不可以為人。
- 非禮之祀，鬼神且不受，況非義之祀乎？
- 人秉陽氣以生，睡則神聚於心，靈光與陽氣相映，如鏡取影，夢生於心，其影皆現於陽氣中，鬼神皆得而見之。
- 心之善惡，亦現於陽氣中。生一善念，則氣中一線如烈燄；生一惡心，則氣中一線如濃煙。
- 人心本善，惡念蔽之。睡時一念不生，則此心還其本體，陽氣仍自光明。
- 大凡風流佳話，多是地獄根苗。孽海洪波，回頭是岸。
- 數雖前定，苟能盡人力，亦必有一二之挽回。
- 輪迴之說，儒者所闢，而實則往往有之。前因後果，理不自誣。
- 妖魅所惑者，皆邪念先萌耳。
- 君子義不負人，不以生死有異也；小人無往不負人，亦不以生死有異也。常人之情，則人在而情在，人亡而情亡耳。
- 鬼自伺放焰口求食外，別無他事。惟子孫念念不能忘，愈久愈切。但苦幽明阻隔，不得音問。較生人之望子孫，殆切十倍。斯言聞之，使人追遠之心油然而生。
- 子與子言孝，父與父言慈。
- 方外人，如於世有所聞見，於心必有所是非；有所是非，必有所愛憎，則喜怒哀樂之情，必迭起循生。
- 道成之後，視一切機械變詐，皆如戲劇。視一切得失勝敗，以至於治亂興亡，皆如泡影。
- 種瓜得瓜，種豆得豆，因果之相償也。花既結子，子又開花，因果之由生也。彼負心者，又有負心者躡其後，不待

鬼神之料理矣。

- 茹蔬啖果，即為功德乎？正以茹蔬啖果，即不殺生耳。
- 禍福有命，死生有數，雖聖賢不能與造物爭。
- 先聖有言，君子於不知，蓋闕如也。
- 大學扼要，在誠意；誠意扼要，在慎獨。
- 修己明道，天理也。近名好勝，則人欲之私也。
- 儒以修己為體，以治人為用；道以靜為體，以柔為用；佛以定為體，以慈為用。
- 佛法廣大，容人懺悔。一切惡業，應念皆消。放下屠刀，立地成佛。
- 天地生財，祇有此數。此得則彼失，此盈則彼虧。機械於是而生，恩 於是而起。孽緣報復，延及三生。觀謀利者之多，可以知索償者之不少矣。足以發人深省也。
- 無往不復者天之道，有施必報者人之情。既已種因，終當結果。
- 害人之術，適以自害。智者慎勿造因。
- 無心布施，功德最大。
- 君子之於小人，謹備之而已。無故而觸其鋒，鮮有不敗也。
- 怙權固位，是必躁競，躁競相軋，是必排擠。至於排擠，則不問人之賢否，而問黨之異同；不計事之可否，而計己之勝負。流弊不可勝言矣，是其惡在貪酷之上。
- 相交者，交以心，非交以貌也。
- 魂歸受祭，確有其事，古人所以事死如生也。
- 聖人作易，言人事也，非言天道也。為眾人言也，非為聖

人言也。聖人從心不踰矩，本無疑惑，何待於占？惟眾人昧於事幾，每兩歧罔決，故聖人以陰陽之消長，示人事之進退，俾知趨避而已。

- 經者常也，言常道也；經者徑也，言人所共由也。
- 檢點生平無不可對鬼魅者，則此心自不動耳。
- 仕宦者貨利相攘，進取相軋。不虞幽冥之中，相攘相軋，亦復如此。
- 君子之於世也，可隨俗者隨，不必苟異；不可隨俗者不隨，亦不必苟同也。
- 儒者著書，當存風化。雖齊諧志怪，亦不當收悖理之言。
- 植黨者多私，爭名者相軋。
- 在在處處有鬼神護持，自必在在處處有鬼神鑒察。
- 每一念及因果報應，覺在在處處有鬼神。

## 第二集（節錄自如是我聞）

- 天地之大，何所不有。幽明之理，莫得而窮。不必曲為之詞，亦不必力攻其說。
- 佛法廣大慈悲，萬物平等。施食及於烏鳶，愛惜及於蟲鼠。
- 飲滷汁者血凝而死，無藥可醫。急取豆漿灌之，滷得豆漿，則凝漿為腐，而不凝血。
- 爾不讀書識字，不能明理，將來何事不可為？上干天律時，爾悔遲矣！
- 好花朗月，勝水名山。偶與我逢，便為我有。迨雲煙過眼，不復問為誰家物矣。何必鐫號題名，為後人計哉。
- 業鏡照真小人，心鏡照偽君子。圓光對照，靈府洞然。大抵名愈高，則責愈嚴。術愈巧，則罰愈重。

- 紀公先太夫人病革時，語子孫曰：舊聞地下眷屬，臨終時，一一相見，今日果然。幸我平生尚無愧色。汝等在世，家庭骨肉，當處處留將來相見地也。姚安公曰：使知人有死，一切作為，必有索然自返者。使能為死時計，一切作為，必有悚然自止者。惜求諸六合之外，失諸眉睫之前也。
- 天下未有所成，先自炫耀。甫有所得，不自韜晦者，自取其敗耶。
- 天下本無事，庸人自召之。
- 舉世盡從忙裡老，誰人肯向死前休？緣不知此生如夢耳。省悟萬事皆空，電光石火。
- 某殺人於七八年前，久無覺者。而游魂為厲，終索命於二萬里外，其可畏也哉！
- 嘉禾耒陽張湜，元季流寓此邦，歿而旅葬，愛其風土，無復歸思。園林凡易十餘主，棲遲未能去也。問：人皆畏死樂生，爾何獨耽鬼趣？曰：死生雖殊，性靈不改，境界亦不改。山川風月，人見之，鬼亦見之；登臨吟詠，人有之，鬼亦有之。鬼何不如人？且幽深險阻之勝，人所不至，鬼得以魂游。蕭寥清絕之景，人所不睹，鬼得以夜賞，人且有時不如鬼。
- 六道誰言事杳冥，人羊轉轂迅無停，三絃彈出邊關調，親見青驢側耳聽。
- 天道乘除，不能盡測。善惡之報，有時應，有時不應；有時即應，有時緩應，亦有時示巧應。
- 悖理聚財，非不驟富，斷無久享之理。
- 所作所受，如影隨形。
- 人之受享，祇有此數，此贏彼縮，理之自然。既於家庭之

內強有所增，至於仕宦之途，陰有所減。世情萬變，治家者平心處之可矣。

- 妖以人興，象由心造，好異隕生，可惜也夫。
- 人能事事如我意，可畏甚矣。
- 好色者必病，嗜博者必敗，劫財者必誅，殺人者必抵，此中之消息微矣。其間功過互償，或以無報為報，罪福未盡；或有報而不即報，毫釐比較，益微乎微矣。
- 天下事，但知其一，不知其二。有收目前之效，而貽日後之憂者。
- 解砒毒方：防風一兩，研為末，水調服之。
- 冷水調石青，解砒毒如神。
- 取非所有者，終不能有，且適以自戕也。
- 鬼必畏人，陰不勝陽也。人之一心，慈祥者為陽，慘毒者為陰；坦然者為陽，深險者為陰；公直者為陽，私曲者為陰。苟立心正大，則其氣純乎陽剛。雖有邪魅，如幽室之中，鼓洪鑪而熾烈焰，沍凍自消。
- 夫盜有敗有不敗：貪官墨吏，刑求威脅之財；神姦巨蠹，豪奪巧取之財；父子兄弟，隱匿偏得之財；朋友親戚，強求詐誘之財；黠奴幹役，侵漁乾沒之財；巨商富室，重息剝削之財，以及一切刻薄計較，損人利己之財，是取之無害。罪惡重者，雖至殺人亦無害，其人本天道之所惡也。若夫人本善良，財由義取，是天道之所福也。如干犯之，事為悖天，悖天終必敗。
- 居吉宅者未必吉，居凶宅者未必不凶。如和風溫煦，未必能使人祛病，而嚴寒沴厲，一觸之，則疾生。良藥滋補，未必能使人驟健，而峻劑攻伐，一飲之，則洞泄。

- 六道輪迴皆各隨平生之善惡，如水之流濕、火之就燥，氣類相感，自得本途。
- 人有所負，雖隔數世猶償也。
- 成毀各有定數。
- 虎不食人，惟食禽獸。其食人者，人而禽獸者耳。大抵人天良未泯者，其頂上必有靈光，虎見之即避。其天良漸滅者，靈光全息，與禽獸無異，虎乃得而食之。勉修善業，當有後福。
- 神，正直而聰明；仙，沖虛而清靜。豈有立丹臺，身依紫府，復有蕩姬佚女，參雜其間，動入桑中之會哉？
- 受人館穀，而疏於訓課，冥司謂無功竊食，屬虛糜，銷除其應得之祿，補所探支。利人修脯，誤人子弟，譴責亦最重。有官祿者，減官祿。無官祿者，則減食祿。一鎰一銖，計較不爽。
- 國之興亡，繫乎天命。兵之勝敗，在乎人謀。一切術數，皆無所用。
- 天下之痛苦，無過於鬻割者；天下之恐怖，亦無過於束縛以待鬻割者。每見屠宰，思彼眾生，其痛苦恐怖，不能下咽耳。
- 蓋無心一語，黃壤已聞。然則有意造言者，冥冥之中，寧免握拳齧齒耶。
- 有功德者，何嘗不富貴耶。寄語世人，早作計可也。
- 一切陰謀，鬼神皆已全知，無更枉拋心力。吾在冥府，大受鞭笞，地下先亡，更人人唾詈，無地自容。惟日避此樹邊，苦雨淒風，酸辛萬狀，尚不知沉淪幾輩，得付轉輪。
- 修道人豈干預人家瑣事。一犬吠影，百犬吠聲。傷天地之

和，召鬼神之忌。怨毒之氣，歷劫難消。苟有幽靈，豈無業報。

- 棺衾必慎，孝子之心；齎骼必藏，仁人之政。
- 天道凡事忌太甚。過奢過儉，皆足致不祥。時時深念，知益己者必損人。凡事留其有餘，則召福之道也。
- 不趁涼爽，自課生徒，涵入書館，不亦愧乎。
- 善根在者轉生，惡貫盈者墮獄。懺悔須及未死時，死後無著力處矣。
- 得意時毋太快意，失意時毋太快口，則永保終吉。得意時毋太快意，則知利害者能之；失意時毋太快口，則賢者或未能知。快口豈特怨尤哉，夷然不屑。故作曠達之語，其招禍甚於怨尤也。
- 魅不足畏，心苟無邪，雖凌之而不敢校。魅大可畏，行苟有玷，雖秘之而皆能窺。
- 心心念佛，則惡意不生，非日念數聲佛，為功德也。日日持齋，則殺業永除，非月除數日，即為功德也。
- 自古聖賢，卻是心氣和平，無一毫做作。
- 人可欺，神則難欺。人有黨，神則無黨。人間之屈彌甚，則地下之伸彌暢。今日之縱橫如志者，皆十年外，業鏡臺前，覈觥對簿者也。
- 童子所見惟嫗婢僮奴，有何好樣？人家賓客太廣，必有淫朋匪友，參雜其間，狎昵濡染，貽子弟無窮之害。數十年來歷歷驗所見聞知，真藥石言也。
- 怨毒之於人，甚矣哉！
- 身從異域來，時見瀛洲島，日落晚風涼，一雁入雲杳。隱

示鴻冥物外，不預人世之是非也。

- 遇意外之橫逆，平心靜氣，或有解時。
- 事佛有益否？佛祇有勸人為善，為善自受福，非佛降福也。若供養求佛降福，則廉吏尚不受賂，謂佛受賂乎？懺悔有益否？懺悔須勇猛精進，力補前愆。今人懺悔，祇是首求免罪，又安有益耶？

### 第三集 （錄自槐西雜誌）

- 五倫之中，惟朋友以義合。不計較報施，厚道也。即計較報施，猶直道也。兄弟天屬，已不可言報施，況君臣父子夫婦，義屬三綱哉。
- 忠孝節義，感天地、動鬼神。
- 人世所為，鬼神無不知也。常人膠膠擾擾，何念不生？但有所畏而不敢為，抑亦賢矣。
- 劫數人所為，非天所為也。明中葉以後，官吏率貪虐，紳士率暴橫，民俗亦率姦盜詐偽，無所不至。是以下伏怨毒，上千神怒，積百年怨憤之氣，而發之一朝。其受禍最酷者，皆其稔惡最甚者也，是可曰天數耶。
- 事大便宜，必有不便宜者在。魚吞鈎，貪餌故也。
- 以勢交者，勢散則離。以財交者，財盡則散。
- 乩仙之術，士大夫偶然遊戲。倡和詩詞，等諸觀劇則可。若藉卜吉凶，當怖其術也。
- 一時爵祿，所得幾何？孽海茫茫，杳無崖岸。
- 問心無愧，即陰律所謂善。問心有愧，即陰律所謂惡。公是公非，幽明一理。
- 慾心所感，淫鬼應之；殺心所感，厲鬼應之；憤心所感，

怨鬼應之。則皆由其人之自召。

- 正理不能禁，而權詞能禁之，可以悟銷鎔剛氣之道矣。
- 好勝者必自及，不仁者亦必自及。東野稷以善御馬，名一國，而極馬之力，終以敗駕。自隕其生，非不幸也。
- 講學家崖岸過峻，使人甘於自暴棄，皆自沽己名，視世道人心如膜外耳。
- 以理斷天下事，不盡其變。即以情斷天下事，亦不盡其變也。
- 瑞不必為祥，妖不必為災，各視乎其人。
- 傳有之，天道遠，人事邇。六經所論皆人事，即易闡陰陽，亦以天道明人事也。
- 邪正之念，妖魅皆得知。報施之理，鬼神弗能奪也。
- 至誠則金石為開，篤信之則誠，誠則必驗。姑試之則不誠，不誠則不驗。凡持煉之術，莫不如是。
- 蘇沉良方：有見小兒吞鐵物方，云：剝新炭皮研為末，調粥三碗，與小兒食，其鐵自下。依方試之，果炭屑裹鐵針而出。
- 心定則氣聚而形固，心搖則氣渙而形萎。
- 天下未有心不在是事，而是事能詣極者；亦未有心在是事，而是事不詣極者。
- 應酬之禮不可廢。
- 是非之公，人心具在。人即可誑，自問已慚。況公論俱存，誑亦何益？榮親當在顯揚，何必以虛詞招謗乎？
- 夫因緣，無無故而合者也。大抵以恩合者必相歡，以怨結者必相忤。又有非恩非怨，亦恩亦怨者，必負欠使相取相

償也，如是而已。雖然，天定勝人，人定亦勝天。故釋迦立法，許人懺悔。逆來順受，盡其在我，而不問其在人。庶幾可以挽回乎？信心行持，無不有驗。

- 夫人之為人，以有人心也。此輩機械萬端，寒暖百變，所謂人面獸心者也。既已獸心，即以獸論。以獸殺獸，事理之常。
- 物必先腐也，而後蟲生之。
- 布施須己財。佛豈不問汝來處，受汝盜來金耶？
- 福以德基。非可祈也。禍以惡積，非可禳也。苟能為善，雖不祭，神亦助之。敗理亂常，而瀆祀以冀神佑，神其受享乎？
- 外患突來，必有內間。
- 人生苦樂，皆無盡境；人心憂喜，亦無定程。曾經極樂之境，稍不適則覺苦。曾經極苦之境，稍得寬則覺樂矣。
- 巨盜李金梁曰：凡夜至人家，聞聲而嗽者怯也，可攻也。聞聲而啟戶以待者，怯而示勇也，亦可攻也。寂然無聲，莫測動靜，此必勁敵，攻之，十恒七八敗，當量力進退矣。
- 屠者買一牛，牛知為屠也，絕不肯前，鞭之則橫逸，氣力殆竭，始強曳以行。牛過一錢肆，忽向門屈兩膝跪，淚涔涔下。錢肆惻之，問知價錢八千，如數乞贖。屠者恨其獯，堅不肯賣。加以子錢，亦不許，曰：此牛可惡，必割刃而甘心，雖萬貫不易也。牛聞是言，蹶然自起，隨之去。屠者煮其肉於釜，然後就寢。五更自起開釜。妻子怪不回，疑而趨視，則已投釜中，腰以上與牛俱糜矣。凡屬生物，無不畏死。不以其畏而憫惻，反以其畏而恚憤。牛之怨毒，加尋常數等矣。厲氣所憑，報不旋踵，宜哉。

- 屠者許學，牽一牛，牛見紀公跪不起。紀公贖之，以與佃戶張存，豢之數年，其駕耒服轅，力作較他牛為倍。然則恩怨之間，物猶如此，人可不深長思哉？
- 有力者不盡其力，乃可以養其威。屈人者使人易從，乃可以就服。
- 紀公曰：余四、五歲時，夜中能見物，與晝無異。七、八歲後漸昏闇，十歲後遂全無睹，或夜半睡醒，偶然能見，片刻則如故。十六、七後以至今，則一兩年或一見，如電光石火，彈指即過。蓋嗜欲日增，則神明日減耳。
- 夫勢之所在，雖聖人不能逆；形之已成，雖帝王不能破。
- 若黨同而伐異，揚己而抑人，何以為世尊乎？
- 夙生債負，受者毫釐不能增，與者毫釐不能減也。是亦可畏也已。

#### 第四集 （錄自姑妄聽之）

- 苟道德無愧於聖賢，雖王侯擁篲不能榮，雖胥靡版築不能辱。陳白崖曰：「事能知足心多愜，人到無求品自高」。
- 夫操管運思，臨秤布子。雖當局之人，有不能預自主持者，而卜者乃能先知之，是任我自為之事，尚莫逃定數，巧取強求，營營然日以心鬥者，是亦不可以已乎。
- 舞衫歌扇，儀態萬方。彈指繁華，總隨逝水。茫茫回首，舊事皆空。豈但海市蜃樓，為頃刻幻景哉？
- 物之輕重，各以其時之好尚，無定準也。
- 立心端正，雖冤鬼亦無如何。
- 神理分明，毫釐不爽。乘除進退，恆合數世而計之。勿以偶然不驗，遂謂天道無知也。

- 心到四禪天，則花自照鏡，鏡不知花；月自映水，水不知月，乃離色相矣。諸菩薩天，則花亦無花，鏡亦無鏡，月亦無月，水亦無水，乃無色無相，無離不離。為自在神通，不可思議。
- 弈竟無常勝法乎？曰：無常勝法，而有常不負法，不弈則常不負矣。世外閒身，名心都盡，逢場作戲，勝敗何關？
- 天下惟同類可畏也。夫甌越之人，與奚霫不爭地；江海之人，與車馬不爭路，類不同也。凡爭產者，必同父之子；凡爭寵者，必同夫之妻；凡爭權者，必同官之士；凡爭利者，必同勢之賈，勢近則相礙，相礙則相軋耳。凡反間內應，亦必以同類，非其同類，不能投其好而入，伺其隙而抵也。由是以思，安得不畏？
- 修道必世外幽棲，始精神堅定。如往來城市，則嗜慾日生。
- 惟聖人不委過於天，先事而綢繆，事後而補救，雖不能消弭，亦必有所挽回。
- 無故而致非常之福，貪冒者所喜，明哲者所懼也；無故而作非分之想，僥倖者其偶，顛越者其常也。
- 世之供車騎受封煮者，必有前因焉，人不知耳。此輩之狡黠攘竊者，亦必有後果焉，不思耳。
- 怨毒糾結，變端百出，至三生之後而未已，其亦慎勿造因哉。
- 聖賢依乎中庸，以實心勵實行，以實學求實用。聖賢之於人，有是非心，無彼我心，有誘導心，無苛刻心。
- 有趙延洪者，性伉直，嫉惡至嚴。每面責人過，無所避忌。然則以訐為直，固非忠厚之道，抑亦非養福之道也。
- 一念轉移，立分禍福。

- 常人誦佛號，佛不聞也。特念念如對佛，自攝此心而已。若忠臣孝子，誠感神明，誦佛號，則聲聞三界，故其力與經懺等。若是孝婦，知必應也。知篤志事親，勝信心禮佛。
- 聲色貨利，嗜慾牽纏，非道力堅定，多不敢輕涉世緣，恐浸淫而不自覺也。
- 人鏡照形，神鏡照心。人作一事，心皆自知，既已自知，即心有此事。心有此事，即心有此事之象，故一照而畢現也。若無心作過，本不自知，則照亦不見，心無是事，即無是象耳。
- 天上無不忠、不孝之神仙。
- 儒之本旨，明體達用而已；佛之本旨，無生無滅而已；道之本旨，清淨沖虛而已。修道者，須謝絕萬緣，堅持一念，使此心寂寂如死，積功累德，自爾感通。內絕世緣，外積陰騭，無怪無奇，是真秘密。
- 一村叟，淳淳悶悶，無計較心；悠悠忽忽，無得失心；落落寞寞，無愛憎心；坦坦平平，無偏私心；人或凌侮，無爭競心；人或欺給，無機械心；人或謗詈，無瞋怒心；人或構害，無報復心。故雖死牖下，無大功德，而獨以是心，為神所福，使之食報於今生。其蠢無知識，正其身異性存，未昧前世善根也。
- 無欲常教心似水，有言自覺氣如霜。
- 法無邪正，惟人所用，如同一戈矛，用以殺掠則劫盜，用以征討則王師耳。
- 唐以前之儒，語語有實用；宋以後之儒，事事皆空談。講學家之闢佛，於釋氏毫無所加損，徒喧闐耳。
- 人情百態，事變萬端，矯枉過甚，顧此失彼。本造福而反

造孽，本弭事而反釀事，亦往往有之。

- 夫餽酒必豐，敬鬼神也。無所祈請，遠之也。敬鬼神而遠之，即民之義也。
- 凡遇毒物，無殺害心，則終不遭螫。或見即殺害，必有一日受其毒，驗之頗信。
- 獨行潭底影，數息樹邊身。二句三年得，一吟雙淚流；知音如不賞，歸臥故山秋。
- 老成遠慮，勝少年盛氣多矣。
- 山谷詩曰：能與貧人共年穀，必有明月生蚌胎。

#### 第五集（錄自 陽續錄）

- 君子與人為善，固應不沒其寸長；講學家持論務嚴，遂使一時失足者無路自贖，反甘心於自棄，非教人補過之道也。
- 俚諺有之曰：角力不解，必同仆地，角飲不解，必同沉醉。斯言雖小，可以喻大矣。
- 饑寒迫汝各謀生，送汝依依尚有情，留取他年相見地，臨階惟歎兩三聲。
- 子弟當先使知禮。
- 有佛緣者，然後能見佛界；有仙骨者，然後能見仙境。未可以尋常耳目，斷其有無。
- 輪迴之說，鑿然有之。恒蘭臺之叔父，生數歲，即自言前身為城西萬壽寺僧。從未一至其地，取筆粗畫其殿廊門徑，莊嚴陳設，花樹行列。往驗之，一一相合。然平生不肯至此寺，不知何意？此真輪迴也。
- 歐陽公曰：禍患常生於忽微，智勇多困於所溺。
- 大抵乩仙，為靈鬼所託，尚實有所憑附。

- 勝負之念不可太盛，恩怨之見不可太明。
- 有一老僧，能記兩世事，初世為屠人，年三十餘死，冥官責以殺孽至重，押赴轉輪受惡報，則已在豕欄矣。時與同類相問訊，能記前身者頗多。至屠市提擲於地，心脾皆震動欲碎，見刀俎在左，湯鑊在右，屠人一牽拽，即惶怖昏瞽，四體皆軟，剗刀於喉，其苦非口所能道。血盡始刺心大痛，遂不能作聲。
- 古詩曰：利旁有倚刀，貪人還自賊。
- 今世之所享，皆前生之所積。日中必昃，月盈必虧；有所不足，正君之福。
- 蓋天之患，莫大於有所恃。恃財者終以財敗，恃勢者終以勢敗，恃智者終以智敗，恃力者終以力敗，有所恃則敢於蹈險故也。
- 詩曰：月夕花晨伴我行，路當坦處亦防傾。
- 敢因恃爾心無慮，便向崎嶇步不平。
- 道力深者，以定靜祛魔。
- 心不驚怖，神不瞽亂，鬼亦不得而侵之。
- 天狐有大神術，惟賢聖所居不敢至，真靈所駐不敢至。
- 小人之謀，無往不福君子也。
- 積而不散，怨之府也。怨之所歸，禍之叢也。千家饑而一家飽，剽劫為勢所必至。
- 紀公十歲時，聞槐鎮一僧，農家子也。好飲酒食肉，廟有田數十畝，自種自食。牧牛耕田外，百無所知，非惟經卷法器皆所不蓄，毘盧袈裟皆所不具。即佛龕香火，亦在若有若無間也。特首無髮，室無妻子，與常人小異耳。一日

忽呼集鄰里，而自端坐破几上，合掌語曰：同居三十餘年，合長別矣，以遺蛻奉託可乎？溘然而逝，合掌端坐仍如故。鼻垂兩玉筋，長尺餘，眾大驚異，共為募木造龕。舅氏安公實齋居丁家莊與相近，知其平日無道行，聞之不信，自往視之。以造龕未竟，二日尚未斂，面色如生，撫之肌膚如鐵石。時方六月，蠅蚋不集，亦了無屍氣，竟莫測其何理也。

- 利令智昏：昔夫差貪句踐之服事，卒敗於越。楚懷貪商於之六百，卒敗於秦。北宋貪滅遼之割地，卒敗於金。南宋貪伐金之助兵，卒敗於元。
- 太聰明，往往以氣凌物，非養德之道，亦非全身之道也。惟學問變化氣質。
- 數皆前定，故鬼神可以前知。然有其事尚未發萌，其人尚未舉念，又非吉凶禍福之所關，因果報應之所繫，游戲瑣屑，至不足道，斷非冥籍所能預注者，而亦往往能前知。
- 古人祠宇，俎豆一方，使後人挹想風規，生其效法，是即維風勵俗之教也。

# 紀文達公筆記六則

淨空學

## 錄自灤陽續錄一

高密單作虞言：山東一巨室，無故家中廩自焚，以為偶遺火也。俄怪變數作，闔家大擾。一日，廳事上砰磕有聲，所陳設玩器俱碎。主人性素剛勁，厲聲叱問曰：青天白日之下，是何妖魅？敢來為祟，吾行訴爾於神矣。樑上朗然應曰：爾好射獵，多殺吾子孫，銜爾刺骨，至爾家伺隙八年矣。爾祖宗澤厚，福運未艾，中霤神灶君門尉，禁我勿使動，我無如何也。今爾兄弟外爭，妻妾內訌，一門各朋黨，儼若寇，敗徵已見，戾氣應之。諸神不歆爾祀，邪鬼已闖爾室，故我得而甘心焉，爾尚憤憤哉？其聲憤厲，家眾共聞。主人悚然有思，撫膺太息曰：妖不勝德，古之訓也，德之不修，於妖乎何尤？乃呼弟及妻至曰：禍不遠矣，幸未及也，如能共釋宿憾，各逐私黨，翻然一改其所為，猶可以救。今日之事，當自我始，爾等聽我，祖宗之靈，子孫之福也。如不聽我，我披髮入山矣。反覆開陳，引咎自責，淚涔涔漬衣袂。眾心感動，並伏几哀號，立逐離間奴婢十餘人，凡彼此相軋之事，並一時頓改，執豕於牢，歃血盟神曰：自今以往，懷二心者，如此豕。方彼此謝罪，聞樑上頓足曰：我復仇而自漏言，我之過也夫，嘆叱而去。此乾隆八、九年間事。

## 錄自灤陽續錄四

乩仙多偽託古人，然亦時有小驗。溫鐵山前輩（名溫敏，乙丑進士，官至盛京侍郎），嘗遇扶乩者，問壽幾何？乩判曰：甲子年華有二秋，以為當六十二。後二年卒，乃知二秋為二年，蓋靈鬼時亦能前知也。又聞山東巡撫國公，扶乩問壽，乩判曰：不知。問：仙人豈有所不知？判曰：他人可知，公則不可知。修短有數，常人盡其所稟而已。若封疆重鎮，操生殺予奪之權。一政善，則千百萬人受其福，壽可以增；一政不善，則千百萬人受其禍，壽亦可以減。此即司命之神，不能預為註定，何況於吾？豈不聞蘇頌誤殺二人，減二年壽。婁師德誤

殺二人，減十年壽耶？然則年命之事，公當自問，不必問吾也。此言乃鑿然中理，恐所遇竟真仙矣。

#### 錄自灤陽續錄四

滄州憩水井，有老尼曰慧師父，不知其為名為號，亦不知是此慧字否？但相沿呼之云爾。紀公幼時，嘗見其出入外祖張公家，戒律謹嚴，餅糖不食。曰：糖亦豬脂所點成也。不衣裘，曰：寢皮與食肉同也。不衣綢絹，曰：一尺之帛，千蠶之命也。供佛麵筋必自製，曰：市中皆以足踏也。焚香必敲石取火，曰：灶火不潔也。清齋一食，取足自給，不營營募化。外祖家一僕婦，以一布為施，尼熟視識之曰：布施須用己財，方為功德，宅中為失此布，笞小婢數人，佛豈受如此物耶？婦以情告曰：初謂布有數十疋，未必一一細檢，故偶取其一，不料累人受捶楚。日相詛咒，心實不安，故布施求懺罪耳。尼擲還之曰：然則何不擲送原處，人亦得白，汝亦自安耶？後婦死數年，其弟子乃洩其事，故人得知之。乾隆甲戌乙亥間，年已七、八十矣，忽過余家，云將詣潭柘寺禮佛，為小尼受戒。余偶話前事，搖首曰：實無此事，小妖尼饒舌耳。相與歎其忠厚。臨行，索余題佛殿一額。余屬趙春澗代書。合掌曰：誰書即乞題誰名，佛前勿作誑語。為易趙名，乃持去，後不再來。近問滄州人，無識之者矣。

#### 錄自灤陽續錄四

景城天齊廟一僧，住持果成之第三弟子。士人敬之，無不稱曰：三師父，遂佚其名。果成弟子頗不肖，多散而託四方。惟此僧不墜宗風，無大剎知客市井氣，亦無法座禪師驕貴氣。戒律精苦，雖千里亦打包徒步從，不乘車馬。先兄晴湖，嘗遇之途中，苦邀同車，終不肯也。官吏至廟，待之禮無加，田夫村老至廟，待之禮不減。多布施、少布施、無布施，待之禮如一。禪誦之餘，惟端坐一室。入其廟如無人者，其行事如是焉而已。然里之男婦，無不曰：三師父，道行清高。及問其道行安在？清高安在？則茫然不知應。其所以感動人心，正不

知何故矣。嘗以問姚安公，公曰：據爾所見，有不清不高處耶？無不清不高，即清高矣。爾必欲錫飛杯渡，乃為善知識耶。此一尼一僧，亦彼法中之獨行者矣。（三師父涅槃不久，其名當有人知。俟見鄉試諸孫輩，使歸而詢之廟中。）

### 錄自姑妄聽之一

季滄洲言，有狐居某氏書樓中，數十年矣。為整理卷軸，驅除蠹鼠，善藏弄者，不及也。能與人語，而終不見其形。賓客宴集，或虛處置一席，亦出相酬酢，詞氣恬雅。而談言微中，往往傾其座人。一日酒糾宣觴政，約各言所畏，無理者罰，非所獨畏者亦罪。有云：畏講學者；有云：畏名士者；有云：畏富人者；有云：畏貴官者；有云：畏善諛者；有云：畏過謙者；有云：畏禮法周密者；有云：畏緘默慎重欲言不言者。最後問狐，則曰：吾畏狐。眾譁笑曰：「人畏狐可也，君為同類，何所畏？請浮大白。」狐哂曰：「天下惟同類可畏也。夫甌越之人，與奚霫不爭地；江海之人，與車馬不爭路，類不同也。凡爭產者，必同父之子；凡爭寵者，必同夫之妻；凡爭權者，必同官之士；凡爭利者，必同勢之賈，勢近則相礙，相礙則相軋耳。且射雉者，媒以雉，不媒以雞鶩；捕鹿者，由以鹿，不由以羊豕。凡反間內應，亦必以同類，非其同類，不能投其好而入，伺其隙而抵也。由是以思，狐安得不畏狐乎？」座有經歷險阻者，多稱其中理。獨一客酌酒狐前曰：「君言誠確，然此天下所同畏，非君所獨畏，仍宜浮大白。」乃一笑而散。余謂狐之罰觴，應減其半，蓋相礙相軋，天下皆知之；至伏肘腋之間，而為心腹之大患，託水乳之契，而藏鉤距之深謀，則不知者或多矣。

### 錄自姑妄聽之二

余十一、二歲時，聞從叔燦若公言：里有齊某者，以罪戍黑龍江，歿數年矣。其子稍長，欲歸其骨，而貧不能往，恒蹙然抱深憂。一日偶得豆數升，乃屑以為末，水搏成丸，衣以赭土，詐為賣藥者以往，

姑以給取數文錢供口食耳。乃沿途買其藥者，雖危症亦立愈。轉相告語，頗得善價，竟藉是達戍所，得父骨，以篋負歸。歸途，於窩集遇三盜，急棄其資斧，負篋奔。盜追及開篋見骨，怪問其故。涕泣陳述，共憫而釋之，轉贈以金。方拜謝間，一盜忽擗踊大慟曰：此人孱弱如是，尚數千里外求父骨，我堂堂丈夫，自命豪傑，顧乃不能耶，諸君好住，吾今往肅州矣。語訖揮手西行，其徒呼使別妻子，終不反顧。蓋所感者深矣！惜人往風微無傳於世。余作灤陽消夏錄諸書，亦竟忘之。癸丑三月三日，宿海淀直廬，偶然憶及，因錄以補志乘之遺。倘亦潛德未彰，幽靈不泯，有以默啟余衷乎？

[淨空法師專集網站\(簡\)](#)製作

若發現有任何錯別字，敬請來信告知，以便修正，功德無量！